



18086

晉乘蒐畧卷之二



國朝

大清

漢地理志并州十郡雲中定襄五原雁門皆在北境  
前編曰唐虞時聲教四訖生聚教訓冀州以北非復  
荒漠人民曰盛舜分冀北地爲并州冀北地壤最濶  
今之邊塞皆在封內帝作都太原荒服環衛西北之  
地益廓自陰山而東迄寧朔代雲分而南趨爲河北  
之脊大河之所以折而南汾晉諸水之所以西入河  
也禹貢錐指并州西距河起東受降城南東至廢東  
勝州界折而南經平魯衛及太原府之河曲保德興  
晉乘蒐畧 卷之二 一

縣汾州府之臨縣永寧寧鄉石樓平陽府之永和太  
寧吉州鄉寧河津滎河臨晉蒲州是爲西河與雍分  
界卽舜所分并州之西界郡國書曰并州恒山以旁  
之郡舜始置分冀北境者也一廢於夏初而成周是  
建再廢於漢末而黃初復仍大抵漢以前之并并之  
全也十郡隸而北境過其半魏所置之并非并之全  
陘嶺以北舉棄之雖有新興之名而無其實并州之  
地南不過上黨太原西不過上郡後人制之以力而  
不能守烏桓鮮卑之內掠河北郡邑之廢徙雲擾皆

在并州太原迤北并州之地半遺荒外非復冀北之舊矣

葉砥晉記云山川雄邃風氣綿厚王伯厚言聖人之化世也其解在水故水一則人心正水清則民心易漢世所謂繫水土之風氣是也杜牧亦云山東之地程其水土與河南等常重十三故其人沈鷲多材力重許可能辛苦晉之風氣亦然山泉水極清而體質重故其人能習勞耐辛苦地氣使然也

困學紀聞成相曰禹敷土平天下躬親爲民行勞苦晉乘蒐略

卷之二

二

得益臯陶橫革直成爲輔嘗考呂氏春秋云得陶化益真窺橫革之交五人佐禹故功績銘乎金石著於盤孟陶卽臯陶也化益卽伯益也真窺卽直成也橫革卽橫革也皆爲禹輔而臯陶獨得心法之精其曰禾廸厥德卽堯克明峻德之義也其言敦叙九族庶明勵翼由邇及遠卽堯親九族平章協和之道也思日贊襄能哲而惠無憂驩兜三苗巧言令色孔子以克底績執中敷治其道率不外此故孟子叙見知與禹並舉也

禹元歲卽帝位國號夏都安邑禹顓頊之孫鯀之子  
以六月六日生於茂州之石紐長於西羌封夏伯及  
卽位因所封國爲有天下之號鄭樵通志帝妣姓名  
文命黃帝軒轅氏之元孫也母有莘氏女曰脩己長  
九尺二寸踐位於安邑卽韓國也以金德王仍有虞  
以建寅之月爲正月色尙黑初禹師於大成摯暨墨  
如子高學於西王懼實懋聖德聲爲律身爲度其德  
不違其仁可親四岳舉之舜進之拜治水土爵司空  
乃度人徒以傅土周行天下主名山川以利於民山  
晉乘蒐略 卷之二 三

川脈理土地所宜風烝所生草木企走蜚動蟲魚畢  
究其政日知錄洪水之後莫急於奠民居故伯禹作  
司空爲九官之首顏師古曰空穴也古人穴居主穿  
土爲穴以居人也亦見漢書百官公卿表注語有所  
本易傳云上古穴居而野處詩云古公亶父陶復陶  
穴未有家室今河東之人尙多有穴居者謂之窰卽  
古陶字莊子言逃虛空虛空卽穴居今人所謂冷窰  
也

元歲建學養老國學曰學大學爲東序在國中小學

爲西序在西郊鄉學曰校祀先聖先師收而祭養老  
養國老於東序養庶老於西序俱舉饗禮服燕衣立  
諫幡揭鐘鼓磬鐸鞀以求諫王以五音聽治爲銘於  
簏簾曰導以道者擊鼓論以義者擊鐘告以事者振  
鐸啟以憂者擊磬有獄訟者搖鞀常曰吾不恐四海  
之士畱於道路恐其畱吾門也一饋十起一沐三握  
髮以勞天下之民

二歲舉益爲相益贊於禹惟德動天至是立作相

四歲復以十二州爲九州收天下之銅鑄九鼎以象

晉乘蒐略

卷之二

四

九州圖各州地理貢賦諸法制以示久遠胡宏曰古  
人制鐘鼎多以載事貽後如晉鄭鑄刑書之類左傳  
謂圖魍魎神姦使民知避王者協于上下以承天休  
顧以此爲事而鑄之於鼎邪

國語四岳佐禹治水高高下下疏川導滯鍾水豐物  
帝胙四岳國命爲侯伯賜姓曰姜氏曰有呂謂其能  
爲禹股肱心膂以養物豐人也

五歲巡狩王出見罪人下車問而泣之左右曰罪人  
不順道君王何爲痛之王曰堯舜之人皆以堯舜之

心爲心寡人爲君百姓各自以其心爲心是以痛之王濟江黃龍負舟舟中人懼王仰天歎曰吾受命於天竭力以勞萬民生寄也死歸也余何憂於龍視龍猶蠖蛭須臾龍俛首低尾而逝

皇輿全覽禹王城在夏縣西夏本安邑所分魏太和初析安邑置夏縣禹王城在其地世紀云禹自安邑徙晉陽漢志自平陽遷安邑復徙晉陽通典并州太原禹所都注云禹都或爲今太原或爲今平陽或爲河東安邑其遷徙之故蹟無考安邑帝都歷少康復晉乘蒐略卷之二  
五  
國迄至於桀湯攻鳴條之野皆是其地太原平陽姑勿深考也

吳越春秋禹周行天下還歸大越登茅山以朝四方羣臣封有功爵有德崩而葬焉至少康恐禹述宗廟祭祀之缺乃封其庶子於越斷髮文身闢草萊而邑焉以奉守禹祀

元歲啟嗣禹卽位禹娶塗山氏生啟荒度土功過門不入塗山氏能明訓教而致其化啟知五事達君臣義持禹之功光昭夏業

前編元歲甲申二歲乙酉伯益歸政就國於箕山之  
陰金氏履祥曰三代以來嗣君皆踰年而稱元益歸  
政在乙酉啟始親政而甲申書元仿胡氏大紀而正  
所統也

王啟三歲伐有扈時有扈氏無道狎侮五行怠棄三  
正王召六卿而誓整軍實以征之大戰于甘不勝六  
卿請伐之王曰不可吾地非淺民非寡也今茲不勝  
是吾德薄而教不善也何以伐爲於是班師琴瑟不  
張鐘鼓弗考不因席不仍味親親長長尊賢委能期  
月而有扈服按禹誓伐有苗班師而苗格啟師承其  
道修德以服遠人故能纘禹之績也

晉乘蒐略

卷之二

六

三歲大亨於鈞臺筮於晉之虛作旋臺於水之陽序  
九辯九歌禹象功作樂曰九辯九歌啟敬承禹功序  
其樂而歌之朱子楚辭集注九辯九歌皆禹樂

竹書紀年后啟征西河夏世侯伯有西河國后啟征  
之啟十一年放季子武觀於西河十五年武觀以西  
河叛夏臣彭伯壽帥師征之武觀來歸古西河國連  
荒外套地白翟雜處其間後桓文亦攘翟至此

太康十有九歲王自安邑畋於洛表羿距王於河王  
不得北歸居河南之陽夏羿於是據冀方之都書曰  
維彼陶唐有此冀方河北帝王之都故曰冀方夏都  
本在安邑王不得入國冀方之地皆入於羿

仲康二歲命胤侯征羲和胤侯解州人史記胤侯作  
微侯命爲大司馬統六師征之作胤征林之奇曰羿  
之立仲康也執其權以號令天下羲和黨惡於羿命  
胤侯征之剪其羽翼故終仲康之世羿不得逞也

后相元歲徙都商邱依斟灌斟尋氏爲羿所逼也羿  
晉乘蒐略 卷之二 七  
不修民事淫於原獸寒浞因羿歸自田殺之使其子  
澆弑王於帝邱后緡歸於有仍浞仍據冀都自此至  
少康得國夏祚中絕者四十年

少康四十歲伯靡誅寒浞立王王誅浞子澆及豷復  
歸安邑初后緡方娠逃出自竇歸有仍生少康臣靡  
奔於有鬲少康長爲仍牧正忌畀而能戒之畀使臣  
椒求之奔有虞爲之庖正姚思妻之二姚而邑諸綸  
有田一成衆一旅乃布德兆謀撫其官職旋收夏衆  
而用之慶得四息伯杼曲列龍畱季杼俱賢逮事乃



俾女艾謀梟季杼誘豷伯靡自鬲收二斟之燼滅泥而立少康少康滅澆於過而伯杼復滅豷於戈復歸故都按至少康奔有虞冀方之地皆爲寒泥所有自河以內無不安於亂賊者觀當日形勢少康之所以布德兆謀者亦難乎爲力矣而人心不忘夏二賊濁亂冀方天下之民皆欲推刃於其腹故伯靡自有鬲收灌尋之衆四方翕然應之羣起誅泥一舉而滅之也而其時夏之君臣亦可謂爲其所難矣通志滎河古綸地夏少康邑也後漢書黃瓊至綸氏稱疾不進

晉乘蒐略

卷之二

八

章懷注綸氏卽夏之綸國少康之邑也引博物記云古之綸少康邑郭璞爾雅注亦以縣有漢水爲古綸據顧寧人考論當日事勢謂寒泥已據夏都使澆用師殺斟灌以伐斟鄩而相遂滅乃處澆於過以致東方處豷於戈以控南國其時靡奔有鬲在河之東少康奔有虞在河之南而自河以內亂賊縱橫滎河居河之北少康亦未能安其居而何以布德兆謀也形勢固如此然天命人心所屬靡能滅泥迎王於河南而立之理亦可信

夏道中興後世復國之始少康轉徙河南至是始北歸故都復禹之績祀夏配天天所命也魏禧曰魏絳述窮羿夏少康之興敗云夏故臣靡事羿寒浞滅羿靡奔有鬲氏以興少康靡歷羿浞垂七十年祀夏配天之日靡年當百歲胡宏曰少康靡鬲受困阨而不渝濱死亡而不怠兢兢業業經營四十年然後克殄元凶復禹舊績故虞世南論歷代中興之主以少康爲冠伯靡亦有夏諸臣之特出者信爲中興之賢佐矣通志夏后氏陵在夏縣北夏王村夏一代陵寢在晉乘蒐略

卷之二

天

焉少康復歸於夏邑仍禹故都而不改故自少康以下陵寢皆在夏王村也夏縣志縣北夏王村有夏后氏陵金建朝元閣於其側

通志安邑縣東北二里有關龍逢墓龍逢安邑人呂柟序平陽遺蹟曰吾於安邑得關龍逢焉死諫忠臣猶墓也鄭樵通志于辛陵轢諸侯左師曹觸龍讒忠良關龍逢引黃圖以諫立而不去履癸曰子又妖言矣於是焚黃圖殺龍逢汲冢張華書謂龍逢諫長夜之宮而薦之以必亡之語桀曰吾之有民猶天之有

日也日亡吾乃亡矣以爲妖言而殺之死而葬於安邑祀於省垣之三立祠與日月爭光矣

桀二十二載公劉遷于豳初舜封后稷于邠稷之子孫實世稷官以服事虞夏傳至不窋值夏道衰失其官竄于戎狄之間再世至公劉乃徙都於豳復修后稷之業周道之興自此

桀四十二歲囚商湯于夏臺旣而釋之湯出見人張網四面而祝之曰從天墜者從地出者從四方來者皆罹吾網湯解其三面更祝曰欲左者左欲右者右晉乘蒐略卷之二

九

欲高者高欲下者下不用命者乃入吾網漢南諸侯聞之曰湯德至矣及禽獸歸之者四十餘國桀忌而更召之囚于夏臺已而釋之

通鑑夏王桀五十有一歲冬十月鑿山穿陵以達於河商書湯伐桀升自陬與桀戰於鳴條之野孔傳謂桀都安邑鳴條在安邑西陬在河曲之南從陬向北渡河東向安邑史記吳起云夏桀之居左河濟右大華安邑西多山阜鑿穿陵通於河違常道矣漢書傳說曰水北方藏萬物者也順事陰氣奉天時得潤下

之性河者下也隨地下流而通也后桀尸位五十餘年當夏之末造陰逆陽伏不出乃穿鑿山陵通水引河又當冬令水涸之候洩天氣發地藏有爲之言者拒不納天子之都必求舟楫之所可知便轉輸通朝貢因其自然固不鑿也禹舊績沿河通貢如故不聞有鑿山穿陵以濟河者桀乃鑿河安邑之西戾於先王西夏東商之應固其宜哉

路史桀卒於亭山其子淳維遁於北野隨畜牧轉移在西河之外漢書匈奴傳其先伯禹苗裔是也

晉乘蒐略

卷之二

十

成湯十有八祀春三月王卽位于亳國號商王歸自克夏咸推王爲天子王再拜而讓三乃卽位于亳帝王世紀湯歸于亳再拜而從諸侯之位曰天下惟有道者宜處之三讓乃卽天子位因所封國爲有天下之號以水德王都亳改建丑月爲歲首歲曰祀十二月建丑得地之正色尙白牲用白牡戎事乘翰朝燕服皐冠而縞衣金氏履祥曰古史不載湯改元劉道原載之非其實也湯之元已立于桀之三十六歲詩商頌韋顧旣伐昆吾夏桀皇輿全覽安邑縣有昆

吾亭湯伐昆吾遂攻鳴條卽安邑之鳴條岡也桀黨於韋顧昆吾故湯伐之昆吾氏爲亂湯乃興師率諸侯伊尹爲相湯自把鉞以伐昆吾遂誓師攻鳴條書序伊尹相湯伐桀戰於鳴條之野作湯誓王師敗績王奔南巢因放焉書傳王出太行涉河奔南巢湯縱而不迫故稱放桀淫虐有殊力能伸鈎索鐵生裂兕虎負恃其勇不務修德而武傷百姓商湯進伊尹冀止其暴尹自亳凡五適夏告以堯舜之道王終不聽滅德任威棄義聽讒諸侯危其位大夫隱其道舉事

戾於天發令逆其時湯乃伐而放之自禹至桀十七君十四世合紀四百三十有九年蘇氏轍曰伊尹以處士從湯及其適夏湯與知之其君臣之心以爲伐桀濟斯世不若使尹事桀以止其亂雖使夏不亡商不興無憾也及其不可復輔始舍而歸商耳其後文王事紂至將囚而殺之然後棄之而西均不欲遽取如此此所以爲湯文而非後世之所能及也書序伊尹旣醜有夏復歸於亳作汝鳩汝方孟子五就湯桀之說本於此輿地考昆吾黨桀敗於鳴條安邑有昆

吾亭昆吾助桀爲蘖者也集傳註苞有三蘖言一本  
三蘖也本則夏桀蘖則韋也顧也昆吾也皆桀之黨  
也左傳昭十八年二月乙卯周毛得殺毛伯過萇宏  
曰是昆吾稔之日也寰宇記湯伐桀時昆吾以兵助  
桀與桀同日而亡皆以乙卯日故有亭於此史記殷  
本紀昆吾氏爲亂湯自把鉞伐昆吾昆吾黨於桀遂  
伐桀桀敗奔於鳴條書序湯自陜北渡河與桀戰於  
鳴條之野皆在中條山下也戰國策桀居天井天井  
踞大行山巔古太行關也桀據險而敗於鳴條險不  
可恃也

晉乘蒐畧

卷之一

十一

通鑑外紀成湯北發渠搜水經注河水自朔方轉經  
渠搜故城此在西河之外者竹書紀年帝辛十七年  
西伯伐翟索隱曰西河郡有白部河西延綏銀三州  
皆白翟地此在西河之內者  
成湯二十有一祀鑄金幣時大旱七年民無所得食  
發莊山之金鑄幣以救旱太史公曰農工商交易之  
路通而龜貝金錢刀布之幣興布於民間爲利歲祲  
逐利之民蓄積餘物稽市物價踊騰糶米至石萬錢

湯鑄幣救旱大紀云伊尹言於王發莊山之金鑄幣通有無於四方以賑救之汜勝之書湯有旱災伊尹作爲區田教民糞種負水澆稼按此亦不得已爲濟涸之策赤地千里豈一滴所能救治旱久則水泉乾竭無可汲引得一滴卽沾一滴之益救荒宜爾也

史記殷本紀湯旣紂夏命還亳作湯誥曰古禹久勞於外有功乎民東爲江北爲濟西爲河南爲淮四瀆已修萬民乃有居按禹修四瀆河爲宗沿江達淮沿淮達濟至於河江淮河濟會於一自北而南交相灌

晉乘蒐略

卷之二

三

注水有所歸人得平土貢道不闕絕湯數遷不越大河之南通貢安民故云有居河自黎陽行內黃安陽出臨漳之東沿河立治中國川原以百數皆會於河環向帝都殷湯至受六百餘祀河不徙流方貢通於天下禹之明德於斯爲盛故湯旣受命而思禹功也通鑑成湯二十有四祀王禱雨於桑林之野祝曰毋以予一人之不敏傷民之命以六事自責曰政不節與民失職與宮室崇與女謁盛與苞苴行與讒夫昌與言未已大雨數千里寰宇志陽城析城山頂有湯

王池東麓地名桑林世傳湯禱雨於此上有成湯廟  
按呂氏春秋周封湯後於宋以奉桑林據此桑林當  
在宋地析城東麓之桑林或出於後人之附會然其  
誠切爲民情辭篤摯足以感發天下後世之人心今  
澤蒲間所在有成湯廟奉祀惟謹同深追感卽以爲  
析城之桑林亦可驗蒲澤之人心矣澤州志州西一  
里成湯廟明馬汝驥詩閭闔開關紫氣分湯王行閣  
坐氤氲春鶯啼樹旌旗合古柏含霜劍氣森千里郊  
原沾大雨八荒簞食望征雲商孫於赫綿神器請讀  
晉乘蒐略

卷之二

古

桑林自省文

明道遺書云澤州北望有桑林卽成湯禱雨處澤州  
志云伊侯山在城西北二十里成湯禱雨伊尹從之  
降毒龍于此上建伊尹祠顧寧人云成湯始都亳後  
移偃師去澤州遠甚安得逾大行而禱雨于此穆天  
子傳曰天子圃田之路南至于桑野北盡桑林左傳  
昭公十六年九月鄭大旱使屠擊祝欵豎柎有事于  
桑山斬其木不雨子產曰有事于山蓺山林也而斬  
其木其罪大矣奪之官邑戰國策張儀說韓王曰秦



下甲取成臯宜陽則鴻臺之宮桑林之苑非大王之  
有矣穆天子傳又曰庚午天子飲于涓上乃遣祭父  
如圃鄭辛未天子北還釣于漸澤食魚于桑野觀此  
則桑林去亳不遠湯之所禱在彼不在此矣按此以  
道之遠近證祭之虛實其義猶有不盡也明道治晉  
城最久善政宜民美不勝書其見聞最真斷不隨俗  
附會也况大旱經年百姓困敝已極亦難深居置民  
疾苦於不問巡視省方大行爲南北之脊偃師相距  
不遠設祭於此默禱山靈以安輯下民帝王撫育天  
晉乘蒐略

卷之二

五

下必誠必信况澤屬自鳳壺陽城陵川窮鄉僻壤奉  
祀不衰蒲解亦有祠祀者此惟盛德至善深入於人  
心至於歷久而不能忘顧寧人援據立議未可爲定  
論矣

山海經景山南望鹽澤卽解池也舊制河南秦鳳以  
西皆食解鹽修隄堰築牆禁牆高一丈五尺厚如之  
環牆闢爲馬路建圈門四座設內外門二重以時啟  
閉原冷鋪二十六復增置六十聯絡適均古稱解鹽  
若通舟楫可食天下非虛語也本草行義燒剝金銀

鎔汁作藥解州池鹽爲佳

呂氏春秋伊尹曰大夏之鹽卽太原晉水所出也解鹽最良禹貢鹽絺但見青州而不及河東之鹽顧寧人謂解鹽池帝堯時爲洪水所埋池停淤泥鹽不上生至舜時底績已久去淤築竭民用得舒故云解慍理如此也池無水則涸多則溢涸則枯溢則淡而不生池水貴少喜清惡濁池西北水多淤泥甚忌外湧金泉黑龍潭皆清流喜收納池外四面皆高中汙下水聚渟蓄積潤作鹹東西七十里南北十七里水紫

吾乘蒐畧

卷之一

六

色澄渟渾而不流水出鹽自印成形如水晶朝取夕復終無減損夏月驕陽薰蒸南風動盪上結鹽板光潔可愛卽周官鹽鹽不煉冶而成也若大夏之鹽則取鹺土煮煎味稍苦不及解鹽之良漢太原郡晉陽雁門郡樓煩縣皆有鹽官鹽味遜解梁嵐勝迤北食戎鹽同輸官課

通鑑三十祀湯崩葬汾陰太甲元祀伊尹奉王見於祖營桐宮而居之王在桐宮三祀復政注成湯陵在今山西蒲州府榮河縣括地志汾陰故城在榮河北

九里俗名殷湯城土地記曰河東郡北八十里有汾陰城北去汾水二里水經汾水過汾陰縣西滎河縣志殷湯陵在縣北四十里百祥村西元癸未淪於汾河以石椁遷葬其縣北十里湯王廟配以伊尹仲虺文獻通考宋太祖初給守陵戶明洪武初建陵寢於其東以便歲時致祭歷代奉祀如初按滎河縣在汾水入黃之間陵濱於黃桐宮在河汾之東去陵百有餘里桐鄉故城可居也或以爲在偃師誤矣

夏縣志縣東五里巫咸山商相巫咸巫賢所隱處下  
晉夷蒐畧

卷之一

七

有巫咸祠旁有巫咸谷中有巫咸水皇輿全覽考證郭璞巫咸山賦序言巫咸以鴻術爲帝堯醫而楚辭有云巫咸夕降史遷謂咸以巫接神事太戊使禳桑穀之災天文家謂殷宣夜之法巫咸爲之當以孔穎達正義君奭傳曰巫氏也以巫爲氏名咸爲正史記巫咸治王家有成伊陟贊言非以巫爲事也初隱於瑤臺山後人以名其山宋趙九經巫谷詩晚晴巫咸谷奇觀眼界寬煙消天露碧霞落嶺塗丹茂樹邀歸鳥微曛赴短闌王維誰喚起寫入畫圖看

書太甲王徂桐宮居憂伊尹曰營於桐宮密邇王其訓無俾世迷王居桐三年克終允德伊尹以冕服奉嗣王歸於亳復政於王書傳桐湯葬地元和志聞喜縣桐鄉故城在縣西南舊以爲伊尹放太甲之所今考其地與滎河湯陵相近書傳言桐宮湯墓不稱陵稱陵自後世始也日知錄古王者之葬稱墓而已左傳曰殽有二陵其南陵夏后臯之墓也周官冢人掌公墓之地並言墓不言陵及春秋以降乃有稱邱者楚昭王墓謂之昭邱趙武靈王墓謂之靈邱代北以晉乘蒐略

卷之二

五七

名其縣蓋因其山之高大者爲之自趙肅侯起壽陵間有以陵稱至漢遂爲定名太甲居憂桐宮顧寧人謂此卽古人廬墓之始曾子問宗子去他國庶子無爵而祭之禮孔子曰向墓而爲壇以時祭若宗子死告於墓而後祭此古人祭墓之始漢明帝初當謁原陵夜夢先帝太后如平生歡旣寤悲不能寐明旦遂上陵其日甘露降於陵蓋一氣之相感情不能已也王居憂密邇原陵朝夕哀思如聞修紀敷求之訓三年克變而復政伊尹保傳之微權也

鄭樵通志巫咸夏縣人其所居里舊號巫咸里後更爲商相坊今名南商坊殷太戊時伊陟贊言於巫咸咸治績有成作咸乂時亳有祥桑穀共生於朝一暮大拱王懼問於伊陟陟曰臣聞妖不勝德王其修德於是大修先王之政明養老之禮早朝晏退問疾弔喪三日而祥桑枯死商自太甲復辟克終允德昔人謂古今善用權者莫過伊尹爲臣道立鵠樹坊繼之者咎單沃丁信任委用一順伊尹所行之事至太庚始啟亂源小甲雍已不能綱紀庶政伊尹相湯營桐

晉乘蒐略

卷之二

六

上繼堯舜之盛德大業寢以衰微唯尹子陟與臣扈戊咸遙接其傳輔王修政書云伊陟臣扈格於上帝巫咸乂王家大戊嚴恭寅畏天命自度不敢荒寧遠方慕義重譯而至者七十六國中興之盛前此未有也商道復昌諸侯歸之咸之子賢相祖乙史記祖乙立殷復興巫賢任職胡氏大紀王之世遷都於耿爲水所圯王懼以巫咸之子賢爲相諸侯賓服天下太和父子繼美輝映前後伊尹善用權而巫咸伊陟諸人一德守正至妖不勝德治功日隆於湯有光矣

商世建都多沿於河祖乙遷邢濱河立都前乎此者  
河圯而遷囂囂圯而遷相相圯遷耿而復圯不一世  
也書序仲丁遷囂作仲丁河亶甲居相作河亶甲祖  
乙圯於耿作祖乙篇皆逸亡不得聞其詳民居患水  
而數徙商道復衰而亦有自內變者大紀論曰太史  
公陽甲之紀云自仲丁以來廢嫡立諸弟子更相代  
立沃丁至陽甲立弟者九世實自大庚開其亂源也  
經世解仲丁運卦當卽蘭裔作慝亳都河決遷於河  
南敖倉之地曰囂自是而後廢嫡階亂諸弟爭立外  
晉乘蒐略

卷之二

九

壬以弟繼河亶甲以弟繼內亂相尋帝都再徙而居  
相祖乙中興遷耿復圯於耿懼而簡相巫賢天下太  
和書云在祖乙時則有若巫賢賢咸之子也祖辛以  
來爭習奢靡沃甲祖庚南庚三世有兄弟爭奪之禍  
臣民蕩析離居陽甲居室崇侈時又有河患民狃於  
饒沃安土重遷盤庚遷殷作書三篇反復告諭以口  
舌代斧鉞而殷邦嘉靖此自大戊祖乙以來又一中  
興迄武丁而更盛孟子所謂由湯至於武丁賢聖之  
君六七作也故紀河東耿都而通論及此

帝王世紀祖乙遷耿史記殷本紀祖乙遷於邢索隱云邢音耿近代本作耿今河東皮氏縣有耿鄉括地志絳州龍門縣東南十二里耿城故耿國也史記秦本紀惠文王九年渡河取汾陰皮氏注皮氏在絳州龍門縣西一里今河津縣也水經注汾水又西逕耿鄉城北故殷都也帝祖乙自相徙此爲河所毀故書序曰祖乙圯於耿作祖乙前編耿在河中府龍門縣鄭康成嘗曰祖乙居耿以後奢侈踰禮土地逼近山川常圯焉至陽甲盤庚爲之臣乃謀徙湯舊都民居

晉乘蒐略

卷之二

三

耿久奢淫成俗故不樂徙夫曰居耿以後曰民居耿久則商七王胥都耿可知矣觀此則鄭康成必有所據而言商自祖乙以來俱都河北盤庚嘗與陽甲謀徙居湯故都及踐位耿又圯於河爰議遷國其時世家大室習於沃饒之利而民亦安土重遷於是反復誥諭上篇是盤庚爲臣時事中篇下篇是盤庚爲君時事以慰安其民書疏王柏曰土氣有厚薄風俗有盛衰冀之爲都天下之形勢也山河險固沃壤迫隘民淳俗儉足以自固至人民文物漸至繁阜風氣日

耗遂爲軌逸圖安之計勢使之然也濱河之地近古  
帝都地壤土豐民稠物饒人所共趨常人之心知利  
而不知害雖數有水禍時圯時壞而不悔者政以厚  
利奪其避患之心也

蘇氏書傳云祖乙圯於耿盤庚不得不遷然自祖乙  
踐位至盤庚一百二十五年而後議遷則更有蕩析  
離居之事非因祖乙之圯而遷也困學紀聞鄭元云  
祖乙去相居耿而國爲水所毀於是修德以禦之不  
復徙也觀此則至盤庚時復圯而徙益信書序祖乙  
晉乘蒐略

卷之二

三

遷耿作祖乙雖不傳其詞而序無一怨咨語何獨於  
盤庚聒聒也蓋以耿地沃饒易以致富至亳則大半  
依山生計勞苦遷之則民免水患而巨室無所貪浮  
言所由起也而祖乙以來之久居於耿可知矣

禮疏商正后稷之祀蔡墨曰稷田正也初烈山氏之  
子曰柱爲稷自夏以上祀之湯旣勝夏廢柱而以棄  
代之祭法昔歷山氏之有天下也其子農能殖百穀  
夏之衰也周棄繼之故祀以爲稷家語古之播百穀  
者惟勾龍秉於社而棄爲稷神易代奉之無敢益者



貨殖傳曰殷人都河內河經殷墟之東故曰河內濱  
河之境土豐物饒人所共趨知利而不知患往往輕  
徙殷時河數圯至五遷都以避患不聞有所隄塞猶  
近循禹跡之故當時河患止於濱河漫溢非如後世  
之漂潰田廬千里一壑也仲丁河亶甲祖乙遷都各  
有作以君名篇雖皆佚亡而紀遷國之由述創制之  
艱蓋莫不以遷都爲重而其時之震蕩離析不得已  
而圖存可知也括地志耿城在絳州龍門縣東南十  
二里水經注汾水又西經耿鄉城北故殷都也帝祖  
晉乘蒐略卷之二  
三

乙自相徙此爲河所毀沉溺墊隘民無所定止故書  
序曰祖乙圯于耿

盤庚元祀遷都于殷改國號曰殷時都河北已久宮  
室奢侈民居墊隘水泉湧鹵不可以行政化王欲徙  
成湯之故都臣民安土重遷咸相咨怨王乃作書告  
諭渡河而南復居于亳改國號曰殷遵湯之德行湯  
之政商道復興諸侯來朝此北亳也商邱南亳也

武丁三祀王旣免喪猶不言羣臣咸諫王于是思建  
良輔夜夢得聖人曰說以夢所見視羣臣百吏皆非

乃使百工圖其像求之野時說爲胥靡築得之見王  
王曰是也與之語果聖人爰立爲相以傅巖姓之號  
曰傅說皇輿考聖人澗卽古傅巖也書序高宗得說  
於傅巖水經注沙澗水北出虞山東南經傅巖歷傅  
說隱室前平陸縣志傅巖在縣東北兩山之峽其下  
有澗源出焉馬跑泉與石嵌泉合南流入河上有傅  
說祠其墓卽在馬跑泉上鄉民歲時虔祀王翰詩年  
年民庶思霖雨猶向高巖祠下求蓋紀實也

武丁三十二祀伐鬼方殷謂西北部落曰鬼方卽夏  
晉乘蒐略

卷之二

三

之獯鬻周之玁狁漢唐宋之匈奴突厥契丹也易旣  
濟之三曰高宗伐鬼方三年克之言遲久而後克也  
以高宗之盛而伐鬼方宜若易然猶必三年而後克  
之武不可驢如是也小人以災禍爲安利生多事之  
擾於無事之世舍內治而幸邊功戎狄之禍遠小人  
之禍近故著之爲戒欲其持重緩進如未濟之時深  
警躁動之失不使用陽剛以求功於外也詩集傳高  
宗伐鬼方爲荆楚之地通鑑注北狄夏曰獯鬻商曰  
鬼方釋史云易繫鬼方以志高宗之功商自中華衰

微戎狄交侵獯鬻方爲西北患古公猶遷都避之是  
卽高宗所伐矣非高宗修德行政剛以用師則不能  
三年勝此勞故旣濟之九三高宗以之非傳說柔而  
能剛貞固不撓則不能三年終此役故未濟之九四  
傳說以之蓋旣濟九三以剛居剛故曰高宗伐鬼方  
而戒小人勿用未濟九四以剛居柔震用伐鬼方震  
懼也臨事而懼未濟者濟矣此聖人繫易通乎剛柔  
之義而大旨不越乎守在四夷也

帝乙元祀命周公季歷爲牧師初古公亶父之妃曰  
晉乘蒐略

卷之二

三

太姜生三子長太伯次仲雍少季歷季歷娶太任生  
昌有聖瑞古公曰我世當有興者其在昌乎太伯虞  
仲知古公欲立季歷以傳昌二人乃亡奔荆蠻文身  
斷髮以讓季歷季歷立是爲公季篤于行義諸侯順  
之嘗伐西落鬼戎至是復伐余無始呼翳徒之戎皆  
克之於是命爲牧師有圭瓚鉅鬯之賜

帝乙七祀周世子昌嗣爲西伯西伯遵后稷公劉之  
業則古公公季之法篤仁敬老慈幼禮下賢者日中  
不暇食以待士嘗行野見枯骨命吏瘞之吏曰此無

主矣西伯曰有天下者天下之主有一國者一國之主固吾其主矣以棺衾葬之天下聞之曰西伯澤及枯骨况于人乎

紂十五祀西伯得呂尚于渭陽尚四岳裔也西伯將出獵卜之曰非龍非鸞非熊非羆所獲伯王之輔於是果遇尚於渭水之陽年七十餘與語大悅曰自吾先君太公曰當有聖人適周周因以興子真是耶吾太公望子久矣故號之曰太公望載與俱歸立爲師謂之師尚父

晉乘蒐略

卷之二

三五

紂十九祀西伯伐崇作豐邑徙都之西伯伐崇令無殺人無壞屋無塞井無伐木無掠六畜不如令者不赦三旬猶不降于是攻滅之

紂三十一祀西伯發東觀兵王以費仲爲政費仲善諛好利又用蜚廉惡來蜚廉惡來善讒譎諸侯益疎西伯東觀兵至于孟津渡河中流白魚躍入王舟中王俯取以祭旣渡有火自上復于下至于王室流爲烏其色赤其聲魄時諸侯不期而會盟津者八百皆曰紂可伐矣西伯曰天命未可乃引師還

方輿紀要平陸縣東三十五里曰傅巖卽殷相傳說  
隱處俗名聖人窟其地亦曰隱賢社史記武丁得說  
於傅險中是時說爲胥靡築於傅險注險亦作巖孔  
安國曰傅氏之巖在虞虢間通道所經有澗水壞道  
常使胥靡刑人築護之說賢而隱代胥靡築以供食  
故曰說築傅巖之野傅巖東北十餘里中條山之  
大阜曰虞山亦曰虞坂左傳入自顛軫是也東西絕澗  
於中築以成道指南北之路謂之軫橋橋之東北曰  
虞原原上道東有虞城其城北對長坂二十餘里謂  
晉乘蒐畧

卷之二

三

之虞坂亦卽傳說所築處矣戰國策客謂春申君昔  
騏驥駕鹽車上吳坂遷延負轅而不能進謂此處也  
虞在晉南虢在虞南晉人假道伐虢卽此元好問虞  
坂行虞坂盤盤上青石石上車踪深一尺當時騏驥  
知奈何千古英雄淚橫臆龍蟠於泥易所嘆麟非其  
時聖爲泣天生神物似有意驗以乖逢知未必若論  
美好是不祥正使不逢何足惜孫陽騏驥不並世百  
萬億中時有一乃知此物非不逢轅下一鳴人已識  
我行坂路多閱馬敢謂羣空如冀北孫陽已矣誰汝

知努力鹽車莫稱屈

唐呂溫傳巖銘序昔殷高宗恭默思道至誠動天天將報之以說爲瑞審形旁求實得於此貞元九年子繇鎬徂洛息駕於虞虢之間升墟瞰原髣髴其地遠跡雖昧清風若存乃作傳巖銘路史傳大繇國夏封之在虞虢之間有傳虛傳巖傳說之祠古之北虞今隸平陸地多傳姓平陸縣志傳巖在兩山之峽王思誠詩山頭百折顛軫坂是也其下有澗源出馬跑泉與石嵌泉合南流入河上有傳說祠唐大歷四年平

晉乘蒐略

卷之二

三

陸令李同建成通二年詔重脩以少牢致祭其墓卽在馬跑泉上地志傳說塚在中條山東西山環拱迴獻泉源清瑩馬跑得之王維登河北城樓詩井邑傳巖上客亭雲霧間

隋地理志聞喜有湯寨山一名景山在縣南八十里夏縣鳳凰山東中條分支也寨爲中條極險峭壁數十仞上有湯廟禱雨多應土人稱湯王山下有郭璞書堂山海經景山南望鹽販之澤北望少澤其草多諸萸秦椒其陰多楮其陽多玉郭景純曰鹽販之澤

卽夏縣鹽地也

漢地理志周分冀州地爲并州周自不窳失官窳於戎翟之間至亶父繼公劉居豳能修世業狄人侵之乃遷於岐改號其國曰周後漢書郡國志美陽有周城美陽故城在鳳翔府岐山縣今岐山縣有周原周之名以此至周公季歷爲牧師伐西戎有功命爲侯伯其後世子昌嗣爲西伯至西伯戡黎乃踰太行入并州之境周興始分冀北地爲并州并州古治太原禹貢旣修太原是也周宣王時王命尹吉甫北伐儼晉乘蒐略

卷之二

七

狃至於太原太原與翟爲鄰春秋之世太原山谷間赤白翟雜處其間齊桓晉文攘及於此蓋西北邊境之巖疆也

史記周本紀西伯陰行善諸侯皆來決平於是虞芮之人有獄不能決乃如周入界耕者皆讓畔民俗皆讓長虞芮之人未見西伯皆慙相謂曰吾所爭周人所恥何往爲祇取辱耳遂還俱讓而去詩大雅虞芮質厥成毛萇傳虞芮之君相與爭田久而不平乃相與朝周入其境則耕者讓畔行者讓路入其邑男女

異路班白不提挈入其朝士讓爲大夫大夫讓爲卿  
二國之君感而相謂曰我等小人不可以履君子之  
庭乃相讓以其所爭爲閑田而退地理志虞在河東  
大陽縣晉太康地記虞西北四十里有芮城平陸縣  
志縣西四十五里南侯澗儀家溝之間曰閑原一名  
讓畔城至今其田民無耕者東南卽虞芮二君墓有  
祠縣東北四十里虞城一名吳城卽虞國都是爲西  
虞芮城縣志縣西二十里芮故城殷芮國今名鄭村  
此北芮城也在馮翊臨晉者爲南芮城左傳桓四年  
晉乘蒐畧

卷之二

天

秦師侵芮敗焉小之也虞芮質成之時文王未受命  
卽秦誓尚稱文考而詩言文王蹶厥生者蓋周公戒  
成王所作文已追王故也

通鑑輯覽商紂三十有一祀西伯發戡黎祖伊聞之  
懼奔告於王王曰我生不有命在天祖伊反曰王不  
可諫矣書注黎國在上黨壺關之地左傳宣十五年  
棄仲章而奪黎氏地注黎侯國上黨壺關縣有黎亭  
元和志潞州城今潞安府卽漢壺關縣也壺關縣志  
壺關故城在縣東南壺口山下務本四里自古爲上



黨郡治縣城西南三十里黎侯嶺上有黎侯亭一統志上黨爲天下之脊壺關又上黨之脊面紫團背鳳嶺左梯壁右龍山羣峯環合宛如一壺居然雄勝顧寧人云以關中定天下者先取河東祖伊之恐蓋有見於此困學紀聞祖伊知周德日盛旣已戡黎勢必及殷恐懼而奔告於王商都朝歌黎在上黨壺關乃河朔險要之地朝歌之西境密邇王畿黎亡則商震必然之勢也通鑑輯覽考定西伯戡黎係武王時事自史遷以爲文王於是傳註皆從其說金氏履祥曰晉乘蒐略

文王三分天下有其二以服事殷豈遽稱兵天子之畿且祖伊之言如是其急非以服事殷時之舉動也吳氏棫以爲戡黎之役在伐紂之時其說誠然因並引大紀及呂祖謙諸儒之說而以戡黎係武王今從之按此審時度勢而得間爲不刊之正論溯自季歷伐西落鬼戎靖河西諸羌之種復克余無始呼翳徒之戎王命爲牧師錫之圭瓚柅鬯加九命爲侯伯此爲西伯之始季歷薨而文王嗣爲西伯篤仁敬老禮下賢者伯夷叔齊讓國不受來歸西伯泰顛闕天散

宜生鬻子辛甲之徒皆往歸之行野瘞無主枯骨曰  
吾固其主矣天下咸戴其仁及釋羸里而賜之弓矢  
鉄鉞使專征伐此專征伐之始初伐密須密須人自  
縛其君而來繼伐崇令曰無殺人無壞屋無塞井無  
伐木無掠六畜違者不赦至三旬弗降而後滅之未  
嘗稱兵於天子之畿也蘇文忠言祖伊奔告意必及  
西伯不利於殷今入以告后出以語人無一語及文  
王知周之興原不利於殷殷之亡初無與於周文王  
之心於茲可見及武王嗣位西伯黎侯近於王畿不  
晉乘蒐略

卷之二

三

恭王命西伯得專征伐因而戡之此因時起事之大  
勢文王未及於此黎於其時種類日繁雜處於并汾  
潞澤山谷之間黎侯嶺雄峙一方據上黨之勝勢其  
故城在黎城縣東北上有壺口關路通河南涉縣卽  
今吾兒峪西伯戡黎蓋以黎恃吾兒峪之險敢拒方  
伯也淮南子云武王欲築宮於五行之山猶戡黎之  
意黎旣平而孟津之師莫之或禦秦坑上黨而韓趙  
危唐平澤潞而三鎮服形勢固有不可忽視者矣  
劉向別錄辛甲事紂七十五諫而不聽去適周文王

封於長子卽爲周大史箴王闕者太公金匱云紂嘗以六月獵於西土發民逐禽民諫曰當時六月天務覆施地務長養今盛夏發民逐禽而元元懸於野君踐一日之苗民百日不食紂以爲妖言而誅之狂暴至此諫亦無益辛甲所以去適周也水經注梁水北流至長子縣故城南慕容垂伐慕容永軍次潞川是也長子縣志長子故城在今城外周二十里辛甲所封地也

史記周武王伐紂飛廉先爲紂使北方還無所報乃

晉乘蒐畧

卷之二

三

爲壇於霍太山而致命焉水經注霍太山上有飛廉墓飛廉以善走事紂惡來以多力見知周王伐紂兼殺惡來飛廉先爲紂使北方還無所報乃於霍爲壇致命得石棺銘曰帝令處父不興殷亂賜汝石椁以葬死遂以葬焉皇甫謐曰飛廉墓去鉞縣十五里周人流厲王於鉞卽此名勝志周厲王陵在霍州城東北飛廉墓在霍州東水經注鉞水流經觀阜北故百邑也趙襄子祠三神於百邑是其地徐賁霍山詩霍山古北鎮勢尊出羣麓山深異風景春盡樹未綠居

人多苦寒鑿土爲住屋屋頂土元厚亦種麻與菽乃知此方民猶有上古俗蓋紀實也

周初以建子月得天之正爲歲首夜半爲朔是謂天統國中並立四代之學辟雍居中北虞學東夏學西殷學是爲大學又建虞庠於西郊夏序於州殷校於黨皆鄉學是爲小學俱祀先聖先師

周初封建諸侯之在晉者叔處封於霍諸叔封于郇虢仲虢叔封於東西虢仲雍之後封於夏墟爲虞通鑑注今山西平陽府霍州有霍城處所封地理通釋

晉乘蒐略

卷之二

三

霍州西南十六里霍城文王子叔處封於此在晉州霍邑縣皇輿全覽郇城在猗氏縣西南文王第十六子所封之國水經注詩云郇伯勞之杜元凱春秋釋地云今解縣西北有郇城服虔曰郇國在解縣東郇瑕氏之墟也今解縣故城東北二十四里有故城在猗氏故城西北鄉俗名之爲郇城考服虔之說與俗符詳於杜釋猗氏縣志郇城三面深谷北面入路止容一車相傳晉永嘉之亂有尙小蓋者帥村民保此今名小蓋堡寰宇記絳州西北十五里有荀城古郇

國也方輿紀要下陽城春秋時虢邑也穀梁傳下陽  
虞虢之塞邑虞在晉南虢在虞南也杜預注下陽虢  
邑在大陽故縣東北三十里平陸縣東北十五里卽  
大陽故城東西虢迄陝洛河陰寶雞之境史記武王  
封周章弟虞仲於周之北故夏墟是爲虞仲司馬貞  
曰夏都安邑虞在其南故曰夏墟卽西虞也西虞本  
舜後所封周以封仲雍後於此

武王十有三年師尙父進丹書於王道其言曰敬勝  
怠者吉怠勝敬者滅義勝欲者從欲勝義者凶王惕

晉乘蒐略

卷之二

三

然爲戒書於席之四端及機鑑盥盤楹杖帶履觴豆  
戶牖劍弓矛各有銘焉席前左端之銘曰安樂必敬  
右端之銘曰無行可悔後左端之銘曰一反一側亦  
不可以忘右端之銘曰所鑑不遠視爾所代機之銘  
曰皇皇惟敬口生垢口戕口鑑之銘曰見爾前慮爾  
後盥盤之銘曰與其溺于人也寧溺于淵溺于淵猶  
可游也溺于人不可救也楹之銘曰毋曰胡殘其禍  
將然毋曰胡害其禍將大毋曰胡傷其禍將長杖之  
銘曰惡乎危于忿戇惡乎失道于嗜慾惡乎相忘于

富貴帶之銘曰火滅修容慎戒必恭恭則壽履履之  
銘曰慎之勞勞則富觴豆之銘曰食自杖食自杖戒  
之憍憍則逃戶之銘曰夫名難得而易失無懃弗志  
而曰我知之乎無懃弗及而曰我杖之乎擾阻以泥  
之若風將至必先搖搖雖有聖人不能爲謀也牖之  
銘曰隨天時地之財敬祀皇天敬以先時劍之銘曰  
帶之以爲服動之必行德行德則興背德則崩弓之  
銘曰屈伸之義廢興之行無忘自過矛之銘曰造矛  
造矛少間弗忍終身之差予一人所聞以戒後世之

晉乘蒐略

卷之二

三

子孫

通志蒲州府猗氏縣北南景村有周八士故里暨八  
士墓縣志明隆慶初崖崩石出僅辨八士數字偏旁  
摹刻邑人何東序有詩詠之正義云八士蓋南宮氏  
文王時皆爲虞官文王詢於八虞是也武王伐商命  
南宮伯達遷九鼎於洛邑命南宮适散鹿臺之財仲  
突以下其行事不少槩見汲冢周書克殷解乃命南  
宮忽振鹿臺之粟乃命南宮伯達與史佚遷九鼎蓋  
南宮忽卽仲忽南宮伯達卽伯達尙書所謂南宮适

卽伯适也又宣和博古圖武王時有南宮仲蓋卽仲  
突仲忽也是八士皆南宮氏何東序詩以紀之

武王十有三年殷伯夷叔齊餓死於首陽山初王伐  
紂夷齊叩馬諫左右欲兵之太公曰此義人也扶而  
去之及平殷亂天下宗周恥不食周粟隱於首陽採  
薇而食古史考夷齊採薇野有婦人曰子不食周粟  
此亦周之草木也於是餓死晉志河東蒲坂有雷首  
山夷齊墓居其陽山南陵柏叢茂卽其兆地也石曼  
卿詩云恥生湯武干戈日寧死唐虞揖遜區宋郭仕  
晉乘蒐略

卷之二

壹

道首陽山行首陽山青龍崕上聳紫蓋陵瑤臺下周  
林壑盤蒼龍嵯峨自太古翠嶺鎮寰中黃河西來遶  
其下日夕雲氣開鴻濛恍疑鬼神護又似丹青工諸  
峯不敢並蒼翠光玲瓏我生癖性愛山水見此奇絕  
摩雙瞳忽憶武王收諸夏夷齊叩馬來山東風雲變  
化適際會恥逐龍虎爭奇功歸來守巖穴鬱鬱抱孤  
忠朝采山上薇暮拾山下蓬渴飲澗中水熱眠雲外  
松旣不學赤松子又不侶商山翁丹誠耿耿照白日  
勁節凜凜摩蒼空首陽青青萬古色不改夷齊之心

胸直與天地相始終千載扶名教二子功無窮我歌  
首陽歌未歇泠然八表生清風

莊子云伯夷叔齊至岐陽見周武王伐殷曰吾聞古  
之士遭治世不避其任遇亂世不爲苟存今立乎周  
以塗吾身也不若避之以潔吾行二子北至首陽之  
山遂饑餓而死路史餘論夷齊冢廟在蒲之蒲坂首  
陽山南馬融顏師古之說同而高誘乃以爲洛東北  
之首陽山通志考論夷齊之蹤當在河東首山者雷  
首也呂氏書夷齊至岐陽而文王已歿武王卽位爲  
晉乘蒐略

卷之二

三

載書三以其一歸夷齊聞之相視而笑乃北行至首  
陽餓焉石曼卿云夷齊死揖讓之區亦非洛陽矣  
路史汾之西河縣百二十里有比干山山在汾陽縣  
西世傳商辛令比干築城於此金志西河有比干山  
孝義有比干臺孔子手書銅盤銘左林右泉後岡前  
道萬世之靈茲焉是寶魏文帝弔比干文扈陽曜而  
靈修兮豈傳說之足奇但至概之不可悛兮寧溘死  
而不移李翰殷太師碑周武下車而封其墓魏孝文  
南遷而創其祠我太宗有天下禋百神而盛其禮追



贈太師諡曰忠烈申命郡縣封墓葺祠置守塚五家以少牢時享

皇輿全覽潞城縣東北二十里有微子嶺嶺下有微子村微子橋嶺上有殷三仁廟潞城縣志潞河源出縣東十五里微子城西北流至西流里入漳魏書地形志壺關縣有微子城寰宇記微子城在今縣東北二十里按繹史辯證蘇子取古史微子抱祭器適周之說如其說果實周滅殷時微子已歸周舍微立庚無是理也孔子曰微子去之初不言其何之微子度

晉乘蒐略

卷之二

三

紂終不我聽身爲懿親固不欲爲苟去姑遜避於荒野以俟其一悟周入殷後釋箕子囚封比干墓獨不及微子以微子遜荒未之獲也迨武庚叛誅始封微子於宋備三恪微子於此義固不可辭而前此則遠遜於荒野而匿其迹也潞城微子村微子嶺未必非其遜荒處也顧寧人謂微子之於周受國而不受封受國以存先王之祀不受爵以示不爲臣之節故終身稱微子至微仲後逮衍及稽始稱宋公書微子之命以舊爵名篇而知武王周公之仁不奪人之所守

也今壺關有微子城潞城以名其嶺千百載後猶稱  
微子而尸祝之紂仇懿親而鄉民虔奉至今禮失而  
求諸野里巷之傳誦千古之公義也

武王十有六年箕子來朝箕子過故殷墟傷故都宮  
室毀圯禾黍生焉欲哭不可欲泣則近婦人故作麥  
秀之歌曰麥秀漸漸兮禾黍油油兮彼狡童兮不與  
我好兮殷之遺民聞之莫不流涕昔人言箕子止怨  
狡童而不及周周之命無惡於商可知矣世本箕子  
箕伯之後也夏世有箕伯虞思後路史箕子之先箕

晉乘蒐略

卷之二

三

伯之封小國也春秋猶有箕崇之國姓纂遼之榆社  
東南三十里古箕城在遼西與瑯琊益都襄邑異榆  
社志箕子食采於榆社唐因名箕州有廟存焉每年  
六月十一日土人依期祭享郡國志榆社東南有箕  
城春秋僖三十三年晉人敗狄於箕卽此寰宇記云  
唐箕州所理也古箕城皆以箕子得名鄉人祠祀至  
今必有所本非徒引昔賢以爲重而附會其說也澤  
州陵川縣志縣東二十里西南山麓有箕子山相傳  
箕子憇此因以名山箕與微志同道同生死去就或

異而忠君愛國之忱則一後之人因其寄迹而名其山同祀於山之麓微箕於今不亡矣

書傳武王克殷訪於箕子箕子陳洪範九疇禹治水時洛水有神龜負文而列於背戴九履一左三右七二四爲肩六八爲足而五居中禹因次第之以成九疇閻百詩尙書古文考證謂其說出僞孔傳漢書禹治洪水賜洛書法而陳之說洪範者皆以洛書洛書出禹經傳皆無其事於洪範尤了不相涉漢儒說經多用緯候之書遂以爲天實畀禹劉歆當莽時尙符

晉乘蒐略

卷之二

三八

瑞敢爲矯誣傳會聖人神明斯道垂治世之大法此必天祐於冥冥之中故箕子以爲傳之禹而禹得之天至云鯀堙洪水汨陳其五行水失其性而五行皆汨禹因而順之得陰陽相協之妙無陽失陰盛之愆所以各止於所而得其性初未嘗有取於一至九之數明言數之盈絀如後世洪範五行之說相得而各有合也

淮南子武王欲築宮於五行之山周公曰五行險固德能覆也使吾暴亂則伐我難矣君子以爲能持滿

蓋亦指太行山而言也太行山列子作大形山海經作五行爲天下之脊在澤州南三十里朱子語類河東河北俱遠太行山堯舜禹所都皆在太行下連亘一千里河北諸州旋其趾潞州上黨在山脊最高處過河便見太行在半天如黑雲然地理通釋秦漢之間稱山北山南山東山西皆指太行以在天下之中故指以表地勢武王欲建宮於此爲設險計顧寧人引周再勳壺關志序言壺邑重關天險俯視中原自昔爲秦晉燕齊之門戶商封同姓爲黎侯壺關卽在

晉乘蒐略

卷之二

三

其境內而負固黨惡西伯首戡之祖伊恐以戒紂蓋亦以爲最勝之地也武王克商後欲築宮於五行之山睠睠於上黨不置可見憑高扼險以鞭弭宇內雖古聖人不能易也唐樞太行山錄山自北紀雲中發宗行平定州至上黨遼沁潞澤衍亘多起彰衛懷三府南受藩垣中原自是西奔爲中條至雷首東發爲燕山至碣石左右行皆其托祖故曰太行又以介省故名省曰山之東山之西太行中原正脉兩腋如華蓋所以冒中原而重其力以太行爲名者蓋言意也

詩譜武王定天下巡守述職陳誦諸國之詩以觀民風俗采之於每歲孟春陳之於五載巡守四仲之月詩由人心生各隨五方之風氣以道所欲言而著爲詩唐魏之風見於一國之詩者可考而知也首蟋蟀知唐之所以興終采苓知唐之所以替猶季札觀樂而知其國之興衰也漢藝文志古有采詩之官王者所以觀風俗知得失自考正也食貨志孟春之月行人振木鐸徇于路以采詩獻之太師比其音律以聞于天子張子云周之興也其君子則重稼穡其室家晉乘蒐略

卷之二

單

則重織紵故誦服之無斁之章而志其盛及其衰而有休其蠶織之咏此風之行於上而著於下者也郭子章晉論古之帝王更都三河讀園桃園棘故其民至於今憂國而忠於主有樞有榆故其民至於今喜樂而愉瞿瞿休休故其民至於今長慮而却顧陟岵陟屺故其民至於今孝閑閑坎坎故其民至於今力穡且葛屨見隘陘焉被汾見貧儉焉陳而觀之然後知風行自上而教化所由先興王之政必及於此也羣書備考云平陽往聖所都氣溫土沃河東殷實漢

唐同稱吏能茹冰蘖可鳴琴治也呂柟送葛平陽序  
云平陽堯都也今其地猶有陶唐氏之遺風焉湖自  
風后掃除世垢猶廟於解州蒼頡治官察民猶文於  
臨汾后稷播時百穀猶地於稷山臯陶明茲五刑猶  
塚於淇洞於箕山吾得許由焉輕世棄瓢猶溪也於  
安邑吾得關龍逢焉死諫忠君猶墓也於夏縣吾得  
巫氏父子焉保乂王家猶峪也傳說之學猶巖乎平  
陸之巖伯夷叔齊之仁猶苗乎西山之薇虞公芮伯  
之讓猶閒乎中條之田茲十有三人多平陽之產張

晉乘蒐略

卷之二

聖

三皇五帝三王之治實乎尙已若漢之尹翁歸唐之  
裴度宋之趙鼎司馬光皆宗法前人得其遺意平陽  
人向善服勤守儉知禮修而明之可繼美於前也

朱子詩辨河東地瘠民貧風俗勤儉乃其風土氣習  
有以使之至今猶然在三代時可知此言其俗之勤  
儉而卽儒者力學之本也于寶晉紀論享天下之大  
福者必先天下之大勞宅天下之至貴者必執天下  
之至賤是以殷王小乙使其子武丁舊勞于外知小  
人之依而周之后妃亦必服澣濯之衣脩煩縵之事

及周公遭變陳后稷先公王業之所由者則皆農夫  
女工衣食之務也古先王之教能事人而後能使人  
其心不敢失於一物之細而後可以勝天下之大舜  
之聖也而飯糗茹草禹之聖也而手足胼胝面目黧  
黑此其所以道濟天下而爲萬世帝王之祖也朱子  
語類言舜之耕稼陶漁夫子之釣弋子路之負米子  
貢之埋馬皆賤者之事而古人不辟也

鹽鐵論曰周公太平之時雨不破塊旬一雨雨必以  
夜詩興雨祁祁雨欲徐徐則入土民氣和樂而雨暘

晉乘蒐略

卷之二

聖

時若昔人言風俗世道之元氣也觀唐風葛生之詩  
堯之遺風變而征役繁世道由之而衰故元氣爲國  
本也畢命一篇以風俗爲本其效見於東遷之後陽  
樊之民不肯從晉及其末也周民東亡不肯事秦王  
化之入人深矣

周禮司燿掌行火之政四時變國火以救時疾昔燧  
人氏察辰心而出火作鑽燧別五木以改火順天時  
以救民疾也心者天之大火辰戌者火之二墓季春  
心昏見于辰而出火季秋心昏見于戌而納之卯爲

心之明堂至是而火大壯是以仲春禁火戒其盛也周官每歲仲春令司烜氏以木鐸修火禁于國中爲季春將出火也司燿掌火政令四時變國火以濟民生季春出火季秋內火民咸從之時則施火令季春火出民乃用火凡國失火野焚萊則隨之以刑罰夫然故天地順而四時成氣不愆伏國無疵癘而民以寧鄭以三月鑄刑書而士文伯以爲必災六月而鄭火蓋火未出而作火宜不免也今之所謂寒食一百五者隨食斷煙謂之龍忌蓋本于此

晉乘蒐略

卷之二

望

周禮職方氏曰冀州其穀宜黍稷爾雅稷五穀之長穀之貴者先諸穀熟用以祭祀曰明粢陶唐之世名農官爲后稷五穀之神曰稷與社相配五穀不可偏祭祭其長以該之生民之詩曰維糜維芑芑稷之轉音也維秬維秠爲黍稷之黏者也周以稽事開基故詳其種植如此今通稱稷爲黍不復知爲稷矣黍以大暑種故謂之黍北方多種之

詩豳風十月穫稻北方稻米出太原晉祠者佳宋梅堯臣晉祠詩稻苗秬秠曾不枯是也爾雅稻一名稌



稻宜於水田并之南北山高土燥不宜種惟河汾之間民人引水灌種或引山泉澆諸水然泉微田少亦不多得稻之糯者可釀酒太原桑落汾州羊膏胥以糯爲母味殊精美稻之早者爲秬也

成王元年召公爲保周公爲師夾輔王室分陝而治陝以西召公主之陝以東周公主之文獻通考垣曲縣有臯落城爲周召分陝之地縣志臯落鎮在縣西北四十里臯落山下又西北則臯落城在焉其東有臯落橋晉侯使太子申生伐臯落氏卽此水經注清晉乘蒐略

卷之二

器

水經臯落城北赤狄之都也世謂之倚毫城名勝志垣曲縣後魏之邵郡也邵郡者以召公分陝爲名今縣東北六十里有邵原祠置古棠樹下

成王三年降霍叔處爲庶人以從管蔡挾武庚爲亂而奪其國也初周公以流言居東取易三百八十四爻各繫以辭憂武庚必叛作鷓鴣詩貽王居東二年王知罪在管蔡迎公歸三叔懼挾武庚以叛周公誅管叔而不及處者事不起於處也故以奪其爵而止義之盡仁之至也迨後周又續封之如蔡仲之命是

也晉獻公滅霍晉國大旱卜之曰霍太山爲祟召霍君奉祀霍公求復其故居霍祀不滅

周成王時樓煩子入朝於京師顧寧人言樓煩子不可考其受封之始或曰夏侯國於今寧武商以來世爲荒服至周初入朝戰國時樓煩與林胡諸部雜處代北考之古牒樓煩已入王會不與林胡爲類上古之時並建要荒以爲藩屏天下有道莫不來王春秋德衰外釁時作葷粥獫狁之裔林胡澹林之類以漸南徙樓煩漸染其習傳世旣久槩名曰胡雖樓煩不自知也是故周王會有樓煩而無林胡樓煩獨有國號其源未可同也或曰王會何以無代曰代子姓殷之同宗周人蓋不躋之荒服按是時山部雜處內地以漸南徙樓煩獨存國號居岢嵐州已非樓煩故國後更移於靜樂益徙而南樓煩古蹟遂湮矣

成王七年禾三苗同秀越裳氏重三譯而來獻白雉周公曰德澤不加君子不享其贄政令不施君子不臣其人譯曰吾國之黃耆曰天無烈風淫雨海不揚波三年矣意中國有聖人乎于是來朝周公致薦于

宗廟使者迷其歸路公錫駢車五乘皆爲指南之制  
使者載之期年而至其國按文王成教於國而虞芮  
之君易爭爲讓此得於所見者也越裳重譯來朝化  
及殊俗此得於所聞者也聞所聞而來見所見而退  
同一道也公守不享不臣之義而德洋恩溥物靡不  
得其所而向化光武之烈猶秉文之德也詩周頌昊  
天有成命二后受之成王不敢康朱子引國語叔向  
曰是道成王之德也成王能明文昭定武烈者也是  
爲祀成王之詩顧寧人云觀賈誼書禮容語引叔向

晉乘蒐略

卷之二

哭

所言文王有大德而功未就武王有大功而治未成  
及成王承嗣仁以臨民而周公左右之公成二后之  
德以光宅天下不獨陝以東之分治矣

成王七年周公畱正東都自陝以東河之南北皆公  
所分正之地也初王至新邑朝諸侯祀清廟定鼎于  
郊鄩卜世三十卜年七百王歸命周公畱後布正其  
民周公之道行如被堯舜之澤矣

成王七年立大社東青土南赤土西白土北驪土中  
央黃土凡建諸侯鑿取其方一面之土苞以黃土苴

以白茅爲土封故曰受削土于王唐封茅土制視此  
漢郊祀志周興邑立后稷之祠血食天下漢元始中  
太師光大司徒羲和歆等議漢興禮儀已有官社未  
立官稷遂於官社後立官稷以夏禹配食官社后稷  
配食官稷後漢禮儀志郡縣置社稷太守令長特祠  
牲用羊承宋志以春秋二仲祭太社太稷爲大祀其  
州縣祭社稷如小祀春秋二祭刺史縣令初獻上佐  
縣丞亞獻州博士縣主簿尉終獻牲用少牢元豐中  
令州縣社立用石元祐中下祭服於州縣

晉乘蒐略

卷之二

四七

平陽郡志稱藐姑射山在平陽城西二十五里平山  
其支阜也平水出焉至襄陵縣城北入汾又名晉水  
水經注云汾水過平陽縣南與平水合平水出平陽  
西壺口山其水東逕孤谷亭又東逕平陽城南東入  
汾俗以爲晉水非也平水出壺口山不出於藐姑射  
顧寧人考正其說援莊子而反失實也

水經注涑水所出俗謂之華谷至周陽與洮水合絳  
縣涑水源出縣東南陳村峪伏流至柳莊復出以其  
源出絳縣亦謂之絳水又有涑水別源出橫嶺之乾

洞亦伏流盤東地中至聞喜縣界復出蓋卽水經注所謂洮水也

史記吳太伯世家周武王克殷求泰伯仲雍之後得周章周章已君吳乃封周章弟虞仲於周之北故夏墟平陸縣志縣東北四十里虞公故城一名吳城卽虞國都漢書地理志注大陽縣吳山在西上有吳城周武王封大伯後於此是爲虞公按虞城書爲吳城猶吳仲書爲虞仲也吳越春秋泰伯曰當有封者吳仲也泰伯無子仲雍立故稱吳仲武王時虞國滅封

晉乘蒐畧

卷之一

吳

周章弟於虞故墟因名虞仲虞吳古通用義自見矣史記唐叔者武王之子成王之弟初武王夢帝謂曰余命汝生子名虞與之唐及生而有文在其手曰虞石經古文虞作𠄎因命之曰虞成王始封叔虞於唐呂氏春秋及說苑皆以周公因王桐葉戲言贊成之令成王益重言明愛弟之義以輔王室蓋封建之盛也或謂周至中葉後國漸弱不振以封建故不知周之所以長世者正以此也驪山之禍危而復存東遷晉鄭是依春秋盟會以尊王室至七國紛爭猶以爲

共主而不敢取嚮唐叔享祀至七百餘年八百年之  
基業至夷厲不失封建之爲功大矣晉世家云封唐  
叔史佚成之

史記唐在河汾之東百里寰宇記夏后時封劉累之  
孫於此至是唐爲亂王滅之與弟叔虞戲削桐葉爲  
珪曰以封若史佚請釋曰王曰吾與之戲耳史佚曰  
天子無戲言言則史書之禮成之樂歌之遂封叔虞  
爲唐侯仍唐之號迨後武公滅晉宗而孔子序詩風  
不曰晉而曰唐見武公能滅晉之宗而不能沒唐之

晉乘蒐畧

卷之二

兪

號能冒晉之號而不能繼唐之統也括地志唐城在  
翼城縣西二十里堯裔子所封成王滅之封弟叔虞  
於此子燮又北徙晉水之陽更名晉春秋大事表唐  
本堯後周成王徙之於許郢之間以其地封叔虞春  
秋唐惠侯是其裔後爲楚所滅漢元帝時以蔡陽之  
白水鄉徙春陵戴侯仁爲春陵侯蘇伯阿過之曰氣  
佳哉鬱鬱葱葱卽此今爲唐城鎮在德安府隨州西  
北顧復初詩白水真人氣鬱葱春陵帝里舊唐風晉  
陽本自伊耆後蕭爽成仇郢市空按顧復初考證輿

地條理分明謂太原縣爲古唐國木堯之後裔周成  
王滅唐以封叔虞仍其國號曰唐叔虞子燮父因其  
地有晉水始改唐號曰晉至晉穆侯遷都於絳詩譜  
云穆侯遷都於絳孝侯改絳爲翼今翼城縣東南十  
五里爲穆侯所徙之絳至景公遷於新田亦謂之絳  
又春秋輿圖考定晉封唐在今太原縣遷於絳在今  
翼城縣再遷新田在今曲沃縣證據確鑿自以春秋  
大事表爲定議

詩曹風邠伯勞之集傳邠伯邠侯文王之後嘗爲州

晉乘蒐畧

卷之二

辛

伯治諸侯有功鄭氏謂文王之子而封於邠邠伯其  
後也猗氏縣志邠城在縣西南左傳所云邠瑕之地  
是也城三面深谷北面入路止容一車水經涑水經  
猗氏縣城北縣南對澤沃饒而近鹽猗頓居此漢因  
以猗氏名縣猗氏故城西北卽邠城也左傳富辰稱  
畢原酆邠文之昭也春秋大事表云今蒲州臨晉縣  
東北十五里有邠城舊有邠國文王子所封亦曰荀  
桓九年荀侯賈伯伐曲沃汲郡古文晉武公滅荀以  
賜大夫原氏黯是爲荀叔晉人謀去故絳諸大夫皆

曰必居郇瑕氏之地卽此郇城亦曰瑕城本一地左氏聯屬言之此河北之瑕也燭之武所云許君焦瑕河外五城之瑕也臨晉縣志瑕城在縣東南水經注瑕城晉大夫詹嘉之故邑晉侯使詹嘉處瑕以守桃林之塞是也輿地志臨晉郇陽東連黃流西距中條揖其南峨嵒峙其後涑水逶迤於左湖海停蓄於右表裏山河風氣完萃保障之險封疆之固蓋古形勝之區三晉之襟喉也元郭嗣與詩臨晉河東邑成周魏解梁懸州居舜坂併縣得虞鄉地里時沿革山川晉夷蒐畧卷之二

至

勢渺茫黃流雄滾滾涑水遠湯湯嵒阜踰聞喜中條接太行靈峯齊偃蹇天柱特昂藏

成王十有三年作九府圖法大府玉府內府外府泉府天府職內職幣職金是爲九府初虞夏商之世幣金三品或黃或白或赤至是太公望立九府圖法錢圓函方輕重以銖布帛廣二尺二寸爲幅長四丈爲疋法一定傳於後世今遵其制

漢書周之成康北伐渠搜水經河自朔方東轉經渠搜故城北渠搜蓋近朔方之地漢志朔方郡有渠搜



縣武紀云北發渠搜是也史記析枝渠搜氐羌西北之部落唐書党項傳曰漢西羌別種其地古析支渠搜也近西河者爲党項迤北卽土谷渾或曰渠搜嘗在西域按成康北伐以靖邊必不遠至數千里外穆王遷戎於太原亦必遷其近邊者如漢之南單于也皇輿全覽云虢公伐太原之戎顧寧人謂在今甘肅平涼府固原州以古太原爲各其必遷自近邊可知也及至太原而不安其居虢公之命自不能已周初西旅通貢雖稍有蠢動亦不爲大患矣

晉乘蒐畧

卷之二

五

史記趙世家孟增幸於周成王是爲宅臯狼蓋增幸於成王而王居之以臯狼之地也按史稱增之父曰季勝季勝惡來之弟而飛廉子也皇甫謚云去甄縣十五里有飛廉塚常祀之增祖飛廉而宅臯狼在霍岳之北至造父復封趙城在霍岳之南由此爲趙氏後卽爲趙簡子邑趙之爲國自宅臯狼始矣通鑑注今平陽府趙城縣有故城在西南卽造父之邑其後爲趙氏至晉趙衰始著永寧志臯狼城在州西北穆王十七年封造父於趙城王西巡得八駿馬造父

以御八駿功得封史記趙世家造父幸於周繆王乃賜造父以趙城由此爲趙氏趙城志趙城故城在縣西南汾水上寰宇記縣初置在故城內麟德九年爲城內少水移向縣西三里卽今治也縣東三里趙簡子城春秋趙簡子居此

穆王三十有五年征犬戎得四白狼四白鹿以歸自是荒服者不至初舜竄三苗於三危其後繁熾及夏之衰犬戎入居內地王西巡狩徐戎叛乃命造父御一日千里長驅而歸征克之至是復征犬戎祭公謀

晉乘蒐畧

卷之二

重

父諫曰先王耀德不觀兵夫兵戢而時動動則威觀則玩玩則無震先王之於民也茂正其德以文修之使懷德而畏威故能保世滋大昔我先王后稷以服事虞及夏之衰弃稷不務我先王不甯用失其官而自竄於戎狄之間遵修其緒至武王致戎於商牧非務武也勤恤民隱而除其害也先王之制戎翟荒服今犬戎氏以其職來王而觀之兵無乃廢先王之訓而王幾頓乎吾聞犬戎樹敦率舊德而守終純固其有以禦我矣不聽征之不克荒服不至王道遂衰

後漢西羌傳穆王西征犬戎遷戎於太原夷王衰弱  
荒服不朝太原之戎時出爲患通鑑外紀宣王伐太  
原戎不克太原遂爲戎狄之居四十一年王征申戎  
破之軍士從征久役作詩怨刺呼祈父而告之曰子  
王之爪牙胡轉予於恤靡所底止蓋謂此四役也周  
自穆王徙戎始世有戎禍平王之遷狄爲之也襄王  
之出狄逐之也故詩人歌之曰戎狄是膺太史公謂  
小雅憂傷而不亂風之變也匹夫匹婦皆得以風刺  
清議在下而世道益降矣

晉乘蒐略

卷之二

五

通志載王系罕山疏云晉國多山而盤紆峴鬱中都  
爲大中都之勢南平北險自北而南百餘里中岡陵  
起伏而蒼翠拔出罕山爲大罕山在榆次縣北五十  
里陽曲縣界太行連絡而下層巒千里山獨偉特巔  
有雲則雨乃榆次之鎮山也東爲冀家山東南爲大  
方山中爲中林山和合寺寺迤西南爲小方山臥虎  
山又起爲龍王頭山饅頭山迤西爲草堆山南有龍  
池一名旱山地形志中都有榆次城壽陽城平譚城  
原過祠旱山

穆天子傳乙酉天子西巡鉞鐙代州志東陘關有鉞  
鐙在州西三十里水經注天井水出東陘關西南北  
有長嶺上東西有通道卽鉞鐙也通典東陘關甚險  
固與西陘關並爲勾注之險通鑑唐天寶十四載祿  
山將高秀巖據大同河東太原閉關拒守朔方節度  
使郭子儀敗賊兵圍雲中拔馬邑遂開東陘關是也  
穆天子傳北登孟門九河之蹙觀於鹽澤注池在解  
縣山海經孟門之山其上多金玉其下有黃堊涅石  
吉州志孟門山在州西六十里壺口之北黃河中流  
晉乘蒐略 卷之二 蓋

大禹鑿通謂之孟門實黃河之巨扼也通典同州韓  
城絳州龍門二縣龍門梁山并峙兩山壁立如門

通志平定州承天軍城在承天山上爲太原恒山之  
界山形峭拔上薄層霄東扼井陘西據太原上游道  
路交通山上有唐裴度韓愈題名石壁卽承天軍寨  
山半有老君堂堂後崖上刻韓愈吳丹過此六字當  
是往鎮州宣諭王庭湊時書也韓愈奉使鎮州夕次  
壽陽驛詩風光欲動別長安春半邊城特地寒不見  
園花兼巷柳馬頭惟有月團團

漢匈奴傳周懿王時王室遂衰戎狄交侵暴虐中國  
中國被其害詩人始作疾而歌之曰靡室靡家玁狁  
之故豈不日戒玁狁孔棘此北狄之近太原者所謂  
拜戎不暇也采薇之詩遣戍役而言其情也古者戍  
役兩期而還今年春暮行明年夏代者至復留備秋  
至過十一月而歸又明年仲春至春莫遣次戍者每  
秋與冬初兩番戍者皆在疆圉如今邊塞之防秋也  
其曰不遑啟居玁狁之故蓋謂上之人非以是苦我  
也直以玁狁侵陵之有所不得已而然也程子云毒

晉乘蒐畧

卷之二

五

民不由其上人懷敵愾之心矣史記周紀懿王時王  
室遂衰詩人作刺古今人物表懿王時政道旣衰怨  
刺之詩作直以采薇爲懿王之詩然詩意皆敘其勤  
苦悲傷之情而又風以義非有所刺而作也季札觀  
周樂歌小雅曰其周之衰乎文中子曰小雅烏乎衰  
其周之盛乎蘇文忠謂季札親見周之衰文中子則  
以文武餘烈歷數百年而不忘采薇一詩所謂悅以  
使民民忘其勞猶文武之遺澤也玁狁孔棘至懿王  
時已盛風之變則始於懿王矣

寰宇記絳縣東南十里太陰山崖壁峭絕陽景不到  
唐樞遊太陰山錄絳縣東三十里峻絕競特石壁平  
峭丹崖橫迤凹特多狀邃塢遐壑巨石幽泉聚流成  
澗山體本高逼邇太行在東尤駕出其上以是晞陽  
少及故曰太陰蓋太行東達中條之過峽也明徐賁  
詩巍巍太陰山崖壁拔嶄峭積水嵌層墟凜若太古  
造凍深草木堅僵立勢難撓高寒橫障空陽景未嘗  
到鄰有義和墓欲問莫可弔如何於此地獨不被臨  
照至今山中烏無性識晴昊聊爲志其事因之發長

晉乘蒐畧

卷之一

七

嘯

周夷王三年荒服不朝命虢公率六師伐太原之戎  
是時王政不修而戎狄環之昭懿以降北狄大爲民  
患顧寧人謂霍山迤北大抵皆爲狄地太原之戎也  
周穆王遷戎居此卽五部之先聲矣左傳晉居深山  
遠於王室王靈不及而拜戎不暇正以此也通鑑輯  
覽考證舊說以爲卽山西太原又一說謂在固原州  
後魏立原州以古太原而名並存之

厲王三十年以榮夷公爲卿士芮良夫諫不聽良夫

姬姓伯爵世爲王朝卿士食采於芮今山西芮城縣是其地時王好利說榮夷公芮良夫諫曰榮公好專利而不知大難夫利百物之所生也天地之所載也王人者將導利而布之上下猶曰怵惕懼怨之來也今王專利其可乎榮公若用周必敗王不聽卒以爲卿士諸侯不享良夫忠於周達於事芮世守其祀基此通志芮城故城在縣西十五里有芮王廟皇輿全覽芮城西枕龍岡芮王廟梁開平元年立芮伯爵而稱王非禮也何南卿言端拱明昌皆有碑俱謂古

晉乘蒐略

卷之二

五

史稱爲王彼必有所據芮本圻內錫封之土食采之邑芮伯世爲周卿士見於史志者巢伯來朝作旅巢命時則在武王與六卿同受顧命時則在成王作柔柔詩以戒貪殘時則在厲王與虢仲同伐曲沃時則在桓王良夫風標卓卓光於前後芮城之祀歷秦漢唐宋迄今廟貌愈崇每歲清明中秋享祀不忒宋端拱歲毀香火社十有一而芮獨存通考謂在馮翊臨晉縣爲南芮芮城之芮今名鄭村者北芮也

厲王三十有七年王出居於彘彘本霍國後爲彘邑

今平陽府霍州有彘城元和志霍卽周厲王所奔之地王奔太子靖匿召公家國人圍之召公曰昔吾驟諫王王不聽故至此今殺王太子王其以我爲讐而懟怒乎乃以其子代王太子太子竟得脫王在彘共和攝政初周公次子留相王室世爲周公召公之後穆公虎世輔王室食采於召爲召公至是代王行政王居匏十有餘年共和輔之相安無言王薨而立宣復興周室當周公召公共和之時唐之僖侯禰嗇儉不中禮漸失唐風之舊詩譜云唐者帝堯舊都今日

晉乘蒐畧

卷之二

堯

太原晉陽堯始居此後乃遷河東平陽成王封母弟叔虞於堯之故墟曰唐侯南有晉水至子燮改爲晉侯其封域在太行恒山之西太原太岳之野至曾孫成侯南徙居曲沃昔堯之末洪水九年下民其咨萬國不粒於時殺禮以救難厄其流乃被於今成侯曾孫僖侯甚嗇愛物國人閔之唐之變風始作然至王出居太岳之陽共和協理國事遺風猶不失也

周宣王元年命尹吉甫北伐玁狁至於太原而止按宣王之有事於太原屢矣九域志汾州古京陵漢京



陵縣地築於北伐獫狁時城冢記平遙縣東七里京  
陵宣王北伐時築郡縣記載畧同六月詩註毛鄭皆  
不詳太原之地以爲卽太原陽曲說始於朱子顧寧  
人辨證在涇原之間然西北地極濶如北部由洮岷  
入者應出平涼之涇原由豐勝入者應出晉陽之太  
原視其所入始知所出其出入無時亦非有定地也  
太原之名依古未改北翟爲患夏殷曰獯鬻周曰獯  
狁秦漢曰匈奴多散處於陰山之南其地負山面河  
水草甘美部人往往設幕依據出沒於并州境內詩  
晉乘蒐畧

卷之二

本

薄伐獯狁至於太原卽其所出沒之地也毛傳言逐  
出之而已不窮追也采芑出車皆言執訊獲醜此不  
言其事但逐出太原而止非必如漢時踰五原高闕  
遠出漠北也獯狁侵鎬至涇陽及其旣敗而歸不能  
久竄原隴由太原出塞卽可歸其巢穴道經平遙籌  
備堵築勢所必至詩云至於太原乃窮追極至之地  
則其所歷過之處已多非困守一隅也周時赤狄散  
處於并汾山谷中與中土民雜處種落繁多廬帳遷  
徙無常西出東歸以類相從事所恒有似以宗朱子

說爲是不可以侵鎬及方謂獫狁未至太原而以涇原爲太原也地志平遙縣本太原屬內割入汾州之地

山海經北次二經之首在河之東其首枕汾名曰管涔之山一名燕京山代南北大山結聚於靜樂縣北之寧化山管涔尤爲奇特山巔天池曰祁連北人呼天爲祁連上廣五里池方里餘其下潛與龍眼泉通南流汾水出焉北流伏地爲桑乾泉源水經注桑乾水出陰館縣西北上下洪源七輪謂之桑乾泉卽索

晉乘蒐畧

卷之二

空

縮水也耆老云其水潛承汾陽縣北燕京山之天池池在山原之上世謂之天池桑乾水自源東南流右會馬邑川水出馬邑西川馬邑縣志桑乾水出靜樂縣之天池伏流至洪濤山下滙爲七源曰上源曰玉泉曰三泉曰馬司洪濤曰金龍池曰小盧曰小蒲爲一流是爲桑乾河之源方輿紀要水經注濕水出雁門陰館縣東北至代郡桑乾縣南與桑乾水合總謂之桑乾水由馬邑縣西南流轉東至河陽堡入山陰界東入應州渾河水入焉合流至大同界如渾水武

州川諸水同入焉東流入陽和迄天成達直隸宣化府懷仁界蓋蘆溝之上源也地志濕水卽溼水

通志圖說河之入中國也自北而南其下龍門經砥柱也自西而東全晉之地二面帶河當其一曲三門七津皆禹貢次第河入中國轉北南下東岸皆晉地經合河境百五十里至潼關逆折而東所謂當其一曲也禹貢砥柱析城至於王屋經行之次第也皆經陽城境內明一統志底柱山在陽城縣南五十里山有三峰中峰最高秀若石柱然登其巔俯視黃河若

練漢書地理志河東郡濩澤縣禹析城山在陽城縣西南水經注山甚高峻上平坦下有二泉亢旱不竭山頂有湯王池池四岸生龍鬚草寰宇記王屋山一名天壇山在陽城縣西南一百二十里高三百餘丈盤踞數十里東瞰濟源西跨垣曲巖嶽秀麗四面懸崖由南天門魚貫而入攀繩而上其巔有軒轅廟道書名小有清虛之天黃帝禮天處壇之方隅陳八玉鏡馬戴宿王屋天壇詩星斗半沉蒼翠色紅霞遠照海濤分折松曉拂天壇雪投筒寒窺玉洞雲絕頂

醮圃人不見深林磬度鳥應聞未知誰與傳金錄獨  
向仙祠拜老君

晉穆侯七年伐條以條之役生太子蓋文侯也命之  
曰仇伐千畝有功以千畝之戰生太子蓋桓叔也命  
之曰成師師服曰異哉君之名子也夫名以制義義  
以出禮禮以體政政以正名是以政成而民聽易則  
生亂嘉耦曰妃怨耦曰仇古之命也今君命太子曰  
仇弟曰成師始兆亂矣兄其替乎左傳注解州安邑  
縣有中條山縣北三十里鳴條岡卽條地也正義曰

晉乘蒐略

卷之二

奎

千畝原在晉州岳陽縣北九十里按穆侯以仇怨師  
武名其子於始生之年幾之動於先見者不自知也  
師服以穆侯愛憐少子取於戰爲名陰識其意知桓  
叔之黨必盛於晉以傾家國故因名以諷諫本大末  
小之喻預及於此哲人知幾信有然也

宣王中興命尹吉甫北伐玁狁時玁狁內侵逼近京  
邑王命吉甫北伐逐之太原而歸于是有六月之詩  
按昔人以詩玁狁匪茹整居焦護侵鎬及京至於涇  
陽之語遂以涇原爲太原而逐之太原之說晦矣然

北部南牧之道太原尤爲衝要并存其說可也

宣王六年西戎殺秦仲仲有子五人王召其昆弟與兵七千使伐西戎破之于是與其先大駱犬邱之地爲西垂大夫

宣王八年不藉千畝厲王時藉田禮廢宣王不復遵古修藉於千畝虢公諫曰民之大事在農是故稷爲大官惟農是務三時務農而一時講武故征則有威守則有財若是乃能媚于神而和于民今欲修先王之緒而棄其大功困民之財何以用民弗聽

晉乘蒐略

卷之二

十四

宣王二十有二年王后姜氏諫王姜后賢而有德王嘗晏起后脫簪珥待罪于永巷傅母通言于王曰妾不才至使君王失禮而晏朝敢請罪王曰寡人不德實自生過非夫人之罪也遂勤于政早朝晏退繼文武之迹成中興之業爲周世宗

周宣王三十八年晉人敗北戎於汾隰汾隰在太原迤南卽太原之戎也初宣王遣兵伐太原戎不克至是晉人敗之春秋時周德日衰北部漸徙而南至晉荀吳敗羣翟於大鹵而太原始闢其疆是宣王時太

原之地不俱爲晉有也尹吉甫伐玁狁逐出太原以其隣於荒服遂止不前太原之戎北戎也渠搜之戎西戎也六月詩所云至於太原晉與狄鄰非不可至也

路史少昊子般尹在汾州及周時爲尹氏采邑有吉甫墓平遙縣志尹吉甫墓在縣上東門外城東將臺相傳尹吉甫所築今其上有高真廟任良才尹吉甫廟記畧吉甫江陽人周宣王時北伐玁狁師次平遙築臺教兵以禦北寇今上東門北隅臺之南有廟廟

晉乘蒐畧

卷之二

壺

東有臺又城冢記平遙縣京陵城周宣王北伐時築元和志京陵城在平遙縣東七里其京尚存漢興增陵於其下故曰京陵汾州於周時皆隸太原魏始割太原四縣地爲邦邑其地帶山側塞民夷雜處宣王北伐當至其地平遙爲尹氏食采之邑祠墓存焉建置事所恒有尹氏之繫於汾固不可沒而宣王北伐至太原亦有故蹟可稽矣

周宣王四十年料民於太原史記周本紀宣王三十九年戰於千畝王師敗績於姜氏之戎宣王旣亡南

國之師乃料民於太原仲山甫諫曰民不可料也古者司民協孤終司商協民姓司徒協旅司寇協禁牧協職場協入廩協出而又治農於耜蒐於農隙耨穫亦於耜獮於旣烝狩於畢時是皆習民數者也又何料焉且無故料民天所惡也害於政而妨於後嗣王卒料之唐固曰南國南陽也在并州東南初用南陽之兵至是乃料民於太原蓋欲料其數而陰爲備也索隱曰千畝在西河介休縣趙世家造父六世至奄父曰公仲周宣王時伐戎爲御及千畝戰奄父脫宣

晉乘蒐略

卷之二

亥

王後漢書郡國志界休縣有千畝聚括地志云千畝原在晉州岳陽縣北九十里皇輿全覽考證謂以千畝屬平陽與索隱異左傳桓二年晉穆侯太子之弟以千畝之戰生解亦指界休杜解補正謂穆侯時晉境不得至界休然宣王戰處之千畝原不限晉境未必不在界休也一說千畝在今山西遼州互存之顧寧人云吾讀竹書紀年而知周之世有戎禍也蓋始穆王之征犬戎六師西指無不率服於是遷戎於太原以黷武之兵而爲徙戎之事懿孝之世戎車屢征

至夷王七年虢公帥師伐太原之戎至於俞泉獲馬千匹則是昔日所內徙者今爲寇而征之也宣王之世雖號中興三十三年王師伐太原之戎不克三十八年伐條戎奔戎王師敗逋三十九年伐姜戎戰於千畝王師敗逋四十年料民於太原其與後漢西羌之叛大略相似幽王六年命伯士帥師伐六濟之戎王師敗逋於是關中之地戎得以整居其間而陝東之申侯至與之結盟而入寇蓋宣王之世其患如漢之安帝也幽王之世其患如晉之懷帝也戎之所由來非一日之故而三川之震壓弧之謠皆適會其時者也然則宣王之功計亦不過唐之宣宗而周人之美宣亦猶魯人之頌僖也事劣而文侈矣書不盡言是以論其世也如毛公者豈非獨見其情於意言之表者哉註云竹書紀年自共和以後多可信蓋必有所傳而論周之世有戎禍原本俱見於此

幽王三年三川震柱下史伯陽父曰周將亡矣天地之氣陰伏而不能出陽迫而不能蒸于是有地震今三川實震是陽失其所而填陰也陽失而在陰源必



塞源塞國必亡昔伊洛竭而夏亡河竭而商亡今周德若二代之季矣其川源又塞塞必竭川竭山必崩山崩川竭亡之徵也若國亡不過十年數之紀也是歲三川竭岐山崩唐固曰伯陽父卽老子也

幽王十有一年晉侯仇與衛侯和合諸侯兵逐戎時申侯以犬戎入寇弑王鄭伯友死之晉衛秦皆以兵來救秦力戰破戎晉侯仇合諸侯逐之立故太子宜臼通鑑注叔虞封唐傅子燮改國於晉八傳爲文侯仇衛侯和卽武公康叔九世孫

晉乘蒐略

卷之二

七

平王元年東遷王避犬戎難東徙洛邑秦以兵送王王封襄公爲諸侯賜之岐以西之地秦於是始國與諸侯通使聘享之禮

周平王元年東遷策命晉侯錫以河內附庸晉於是始大書序平王錫晉侯秬鬯圭瓚作文侯之命曰知錄平王二十一年晉文侯殺王子余臣於攜文侯之命報其立己之功而望之以殺攜王之效也文侯用師替攜王以除其偏而定平王之位非能繼文武之緒者也孔子生於二百年之後蓋有所不忍言而錄

文侯之命於書錄揚之水之篇於詩其旨微矣時鎬  
京爲西戎所有王自申東保於維天子之國與諸侯  
無異其言昭乃顯祖追孝於前文人推本唐叔之盛  
而所以望之者切矣呂祖謙言由此而上則爲成康  
爲文武由此而下則爲春秋爲戰國乃消長升降之  
交會然自東遷以後一纔未絕王室之不振不能無  
憾於晉也

史記衛武公平戎有功王命爲公公年九十五猶箴  
儆于國曰自卿以下至于師長士苟在朝者無謂我

晉乘蒐略

卷之二

亥

毫而舍我必恪恭于朝夕以交戒我于是作懿戒以  
自儆及其歿也謂之睿聖武公

平王十九年戊申申王母家也遣兵遠戍戍者怨思  
作揚之水以刺朱子曰申侯與犬戎攻宗周弑幽王  
平王知有母而不知有父知其立已爲有德而忘不  
共戴天之讐反爲酬恩逆理至此亦不能再振矣

平王二十一年秦伯獻戎捷秦伯以兵伐戎戎敗走  
於是收周餘民有之地至岐此秦霸之始時宗周宮  
室盡爲禾黍大夫行役過之傍徨不忍去作黍離詩

周平王二十有六年晉昭侯封其叔父成師於曲沃成師穆侯子文侯弟是爲桓叔晉大夫師服曰國家之立也本大而末小是以能固故天子建國諸侯立家鄉置側室大夫有貳宗士有隸子弟今晉甸侯也而建國本旣弱矣其能久乎後曲沃強盛晉室微弱國內大亂昭侯七年晉潘父弒昭侯而納桓叔不克國人立昭侯子平爲孝侯孝侯八年桓叔卒子驪代是爲曲沃莊伯莊伯弒孝侯於翼國人攻之立孝侯子邾是爲鄂侯鄂侯卒莊伯復伐晉王使虢公伐曲沃立鄂侯子光是爲哀侯積弱至不振已甚如師服

晉乘蒐畧

卷之二

充

言

詩譜云魏之變風作於周平桓之世魏本堯舜禹所都之地在禹貢冀州雷首之北析城之西周以封同姓其封域南枕河曲北涉汾水昔舜耕厯山陶河濱禹菲飲食而孝鬼神惡衣服而美黻冕卑宮室而力溝洫一帝一王儉約之化於時猶存魏君嗇且福急不務廣修德於民與秦晉鄰國日見侵國人憂之而作是詩徐與喬云君子所其無逸不過知民之依若

魏君采莫以自課直與民爭利矣勤儉不中禮貪忍皆從此出也魏政之儉非儉也嗇也養財爲儉貪財爲嗇魏風以碩鼠終有以夫朱謀埠云左辟象掃貴者飾也冬服夏屨女執婦功出自富貴之家故以爲福伐檀則無臣碩鼠則無民魏之所以不能安其居也

史記貨殖傳周猗頓用鹽鹽起周禮鹽人云共苦鹽苦讀如鹽謂出鹽直用不練也史記正義猗氏蒲州縣也猗頓居猗氏用鹽鹽起河東鹽池作畦若種韭

晉乘蒐畧

卷之二

七

天雨下池中鹹淡得均卽畎池中水上畔中深一尺許以日暴之五六日則成鹽猗頓用之以起也孔叢子猗頓魯之窮士也耕則常饑桑則常寒聞朱公富往而問術焉朱公告之曰子欲速富當畜五特於是乃適西河大畜牛羊於猗氏之南十年之間其息不可計貨擬王公名馳天下以興富於猗氏故謂之曰猗頓魏文侯居河北故城今芮城縣地處河山之間土地逼隘文侯作盡地力之教朱公治產積居與時逐而不責於人故善治生者能擇人而任白圭樂觀

時變人棄我取人取我與能薄飲食忍嗜欲節衣服  
與用事僮僕同苦樂趨利若猛獸摯鳥之發嘗自謂  
曰吾治生產猶伊尹呂尙之謀孫吳用兵商鞅行法  
是也其智不足與權變勇不足以決斷仁不能以取  
子彊不能有所守難以學吾術也猗頓不獨用鹽  
師朱公畜犍之法蓋亦祖白圭朱公之善治生而有  
得者水經注涑水經猗氏故城北縣南對澤卽猗頓  
之故居猗氏縣志猗頓故居在縣南二十里王寮村  
又有陶朱公廟皇輿全覽周猗頓墓在猗氏縣王寮  
村

晉乘蒐略

卷之二

七  
主

燕間錄山西土瘠天寒生物鮮少故禹貢冀州無貢  
物詩云好樂無荒良士瞿瞿朱子以爲唐魏勤儉土  
風使然而實地本瘠寒以人事補其不足耳太原迤  
南多服賈遠方或數年不歸非自有餘逐什一也蓋  
其土之所有不能給半歲之食不得不貿遷有無取  
給他鄉太原迤北岡陵邱阜磽薄難耕鄉民惟倚墾  
種上嶺下坂汗牛痛僕仰天待命無平田沃土之饒  
無水泉灌溉之益無舟車魚米之利兼拙于營運終

歲不出里門甘食蔬糲亦勢使之然而或厭其嗜利  
或病其節嗇皆未深悉西人之苦原其不得已之初  
心也天祿識餘亦引前說庶爲近理

齊語桓西征攘白翟至西河乘桴濟河出於閭洛之  
間顧祖禹謂永寧州春秋時爲白翟地桓公攘翟至  
西河猶在河西也正封疆以禁寇暴晉之西鄙救寧  
管仲相桓之力也初鮑叔受管仲三釁三沐進於桓  
立以爲相仲爲政四民不使雜處制國爲二十一鄉  
作內政以寄軍令官山海以準輕重立三選以擇賢  
晉乘蒐略

卷之二

三

分五屬以布憲重農以權國幣贖罪以備器械厚聘  
幣反侵地以親諸侯齊侯悉從之故仲得盡其才而  
伯功立西征至西河蓄治軍以攘夷狄而安諸夏此  
經緯天下匡濟一時之大略得於春秋之世尤難宣  
聖所以亟稱之而大其功也

國語管子制五家爲軌軌爲之長十軌爲里里置有  
司四里爲連連爲之長十連爲鄉鄉有良人焉以爲  
軍令五家爲軌故五人爲伍軌長帥之十軌爲里故  
五十人爲小戎里有司帥之四里爲連故二百人爲

卒連長帥之十連爲鄉故二千人爲旅鄉良人帥之  
五鄉一帥故萬人爲一軍五鄉之帥帥之伍之人世  
同居少同遊故夜戰聲相聞足以不乖晝戰目相視  
足以相識其權欣足以相死居同樂行同和死同哀  
是故守則同固戰則同彊按此卽古者寓兵於農之  
意而參用後世之法寄軍令於內政遇有征伐鄰國  
不知軍不譁而民不擾此所以爲天下才也晉作六  
軍而僭於家仲修內政而藏於國一彼一此公私強  
弱之分較然矣

晉乘蒐略

卷之二

七

平王五十一年王貳於虢將畀虢公政鄭祭足帥師  
入寇金履祥曰以虢爲卿士此鄭伯爭政之由桓王  
伐鄭之故通鑑注平王東遷虢仲之後徙於上陽是  
爲南虢仲之後又分爲北虢班固曰北虢在大陽是  
也大陽漢縣故城在今解州平陸縣

明一統志平定州西北五里鵲山下有平地泉名靈  
應池池上有靈應王扁鵲墓池旁有靈應王祠鵲嘗  
至周其有墓與祠無考元好問詩古柳輪囷數十圍  
鵲山祠廟此遺基是也鵲神於醫而法不盡傳周禮

醫師歲終稽其醫事以制其食十全爲上十失一次  
之十失二次之十失三又次之十失四五斯爲下矣  
古之時庸醫殺人今之時庸醫不殺人亦不活人使  
其人在不死不活之間其病日深而卒至死夫藥有  
君臣人有強弱有君臣則用有多少有強弱則用有  
半倍古人上醫惟是別呱呱旣精別然後識病而後  
視其強弱分別君臣而藥之多少隨宜鮮不愈矣平  
定州祀扁鵲於鵲山之麓廟祀至今醫重於世亦惟  
稽其醫事而用之也

晉乘蒐略

卷之二

七



